

অবনীন্দ্রনাথ ঠাকুর

শকুন্তলা

মহাভারতের কথা অমৃতসমান । আর
মহাভারতের অন্তর্গত শকুন্তলার কথা ?
এমন বেদনামধুর উপাখ্যান পৃথিবীতেই
কম লেখা হয়েছে । এই কাহিনী নিয়েই
মহাকবি কালিদাসের অমর নাটক ।
শকুন্তলার সেই অসামান্য কাহিনীকেই
ছোটদের জন্য নতুন করে লিখে গিয়েছেন
অবনীন্দ্রনাথ ঠাকুর । তাঁর ভাষায় জাদু,
বর্ণনায় সম্মোহন ।
ছবির পর ছবি দিয়ে লেখা এক
চিরকালীন রূপকথা—অবনীন্দ্রনাথের
এই ছোটদের ‘শকুন্তলা’ ।
এ-ছাড়াও পাতা জোড়া-জোড়া বিস্তর
চোখ-জুড়োনো ছবি, ঐকেছেন একালের
নবীন শিল্পী সুরত চৌধুরী ।



9 788170 660224

www.amarboi.com

শকুন্তলা

শকুন্তলা

শিক্তকুশ

শকুন্তলা

অবনীন্দ্রনাথ ঠাকুর



আনন্দ

শকুন্তলা

দশম অঙ্ক

প্রথম আনন্দ সংস্করণ ডিসেম্বর ১৯৮৬ থেকে নবম মুদ্রণ সেপ্টেম্বর ২০০০ পর্যন্ত

মুদ্রণ সংখ্যা ৮২২৫০

দশম মুদ্রণ এপ্রিল ২০০৪ মুদ্রণ সংখ্যা ১০০০০

প্রচ্ছদ ও অলংকরণ সুরত চৌধুরী

ISBN 81-7066-022-X

আনন্দ পাবলিশার্স প্রাইভেট লিমিটেডের পক্ষে ৪৫ বেনিয়াটোলা লেন
কলকাতা ৭০০ ০০৯ থেকে সুবীরকুমার মিত্র কর্তৃক প্রকাশিত এবং

স্বল্পা শ্রিটিং ওয়াকস প্রাইভেট লিমিটেড
৫২ রাজা রামমোহন রায় সরণি কলকাতা ৭০০ ০০৯
থেকে মুদ্রিত।

মূল্য ১৫.০০

শকুন্তলা



এক নিবিড় অরণ্য ছিল। তাতে ছিল বড়-বড় বট, সারি সারি তাল, তমাল, পাহাড় পর্বত, আর ছিল—ছোট নদী মালিনী।

মালিনীর জল বড় স্থির—আয়নার মত। তাতে গাছের ছায়া, নীল আকাশের ছায়া, রাঙা মেঘের ছায়া—সকলি দেখা যেত। আর দেখা যেত গাছের তলায় কতকগুলি কুটিরের ছায়া। নদীতীরে যে নিবিড় বন ছিল তাতে অনেক জীবজন্তু ছিল। কত হাঁস, কত বক, সারাদিন খালের ধারে বিলের জলে ঘুরে বেড়াত। কত ছোট-ছোট পাখি, কত টিয়াপাখির বাঁক গাছের ডালে-ডালে গান গাইত, কোটরে-কোটরে বাসা বাঁধত।

দলে-দলে হরিণ, ছোট-ছোট হরিণ-শিশু কুশের বনে, ধানের
খেতে, কচি ঘাসের মাঠে খেলা করত। বসন্তে কোকিল গাইত,
বর্ষায় ময়ূর নাচত।

এই বনে তিন হাজার বছরের এক প্রকাণ্ড বটগাছের তলায়
মহর্ষি কণ্ঠদেবের আশ্রম ছিল। সেই আশ্রমে জটাধারী
তপস্বী-কণ্ঠ আর মা-গৌতমী ছিলেন, তাঁদের পাতার কুটির
ছিল, পরনে বাকল ছিল, গোয়াল-ভরা গাই ছিল, চঞ্চল বাছুর
ছিল, আর ছিল বাকল-পরা কতকগুলি ঋষি-কুমার।
তারা কণ্ঠদেবের কাছে বেদ পড়ত, মালিনীর জলে তর্পণ করত,
গাছের ফলে অতিথিসেবা করত, বনের ফুলে দেবতাদের
অঞ্জলি দিত।

আর কি করত ?

বনে-বনে হোমের কাঠ কুড়িয়ে বেড়াত, কালো-গাই ধলো-গাই
মাঠে চরাতে যেত। সবুজ মাঠ ছিল তাতে গাই-বাছুর চরে




বেড়াত, বনে ছায়া ছিল তাতে রাখাল-ঋষির খেলে বেড়াত।
তাদের ঘর গড়ার বালি ছিল, ময়ূর গড়বার মাটি ছিল, বেণু
বাঁশের বাঁশি ছিল, বটপাতার ভেলা ছিল ; আর
ছিল—খেনবার সাথী বনের হরিণ, গাছের ময়ূর ; আর
ছিল—মা-গৌতমীর মুখে দেবদানবের যুদ্ধ কথা, তাত-কণ্ঠের
মুখে মধুর সামবেদ গান।


সকলি ছিল, ছিল না কেবল আঁধার ঘরের মাণিক ছোট
মেয়ে—শকুন্তলা। একদিন নিশুতি রাতে অঙ্গুরী মেনকা তার
রূপের ডালি—দুধের বাছা—শকুন্তলা মেয়েকে সেই তপোবনে
ফেলে রেখে গেল। বনের পাখিরা তাকে ডানায় ঢেকে বুকে
নিয়ে সারা রাত বসে রইল। বনের পাখিদেরও দয়ামায়া আছে,
কিন্তু সেই মেনকা পাষাণীর কি কিছু দয়া হল।

খুব ভোরবেলায় তপোবনের যত ঋষিকুমার বনে-বনে ফল ফুল
কুড়তে গিয়েছিল। তারা আমলকী বনে আমলকী, হরীতকী






বনে হরীতকী, ইংলী ফলের বনে ইংলী কুড়িয়ে নিলে ;
তারপরে ফুলের বনে পূজার ফুল তুলতে-তুলতে পাখিদের
মাঝে ফুলের মতো সুন্দর শকুন্তলা মেয়েকে কুড়িয়ে পেলে ।
সবাই মিলে তাকে কোলে করে তাত কণ্ঠের কাছে নিয়ে এল ।
তখন সেই সঙ্গে বনের কত পাখি, কত হরিণ, সেই
তপোবনে এসে বাসা বাঁধলে ।
শকুন্তলা সেই তপোবনে, সেই বটের ছায়ায় পাতার কুটির
মা-গৌতমীর কোলে-পিঠে মানুষ হতে লাগল ।
তারপর শকুন্তলার যখন বয়স হল তখন তাত-কণ্ঠপৃথিবী
খুঁজে শকুন্তলার বর আনতে চলে গেলেন । শকুন্তলার হাতে
তপোবনের ভার দিয়ে গেলেন ।
শকুন্তলার আপনার মা-বাপ তাকে পর করলে, কিন্তু যারা
পর ছিল তারা তার আপনার হল । তাত-কণ্ঠ তার আপনার,
মা-গৌতমী তার আপনার, ঋষি বালকেরা তার আপনার



ভাইয়ের মতো । গোয়ালের গাইবান্ধু—সে-ও তার আপনার, এমনি-কি—লতাপাতা তারাও তার আপনার ছিল । আর ছিল—তার বড়ই আপনার দুই প্রিয়সখী অনসূয়া, প্রিয়স্বদা ; আর ছিল একটি মা-হারা হরিণ শিশু—বড়ই ছোট—বড়ই চঞ্চল । তিন সখীর আজকাল অনেক কাজ—ঘরের কাজ, অতিথি-সেবার কাজ, সকালে-সন্ধ্যায় গাছে জল দেবার কাজ, সহকারে মল্লিকালতার বিয়ে দেবার কাজ ; আর শকুন্তলার দুই সখীর আর একটি কাজ ছিল—তারা প্রতিদিন মাধবী লতায় জল দিত আর ভাবত, কবে ওই মাধবী লতায় ফুল ফুটবে, সেই দিন সখী শকুন্তলার বর আসবে ।

এ-ছাড়া আর কি কাজ ছিল ?—হরিণ-শিশুর মতো নির্ভয়ে এ-বনে সে-বনে খেলা করা, ভ্রমরের মতো লতা-বিতানে গুন্ গুন্ গল্প করা, নয়তো মরালীর মতো মালিনীর হিম জলে গা ভাসানো ; আর প্রতিদিন সন্ধ্যার আঁধারে বনপথে বনদেবীর মতো তিন সখীতে ঘরে ফিরে আসা—এই কাজ । একদিন দক্ষিণ বাতাসে সেই কুসুমবনে দেখতে-দেখতে প্রিয় মাধবীলতার সর্বাঙ্গ ফুলে ভরে উঠল । আজ সখীর বর আসবে বলে চঞ্চল হরিণীর মতো চঞ্চল অনসূয়া প্রিয়স্বদা আরও চঞ্চল হয়ে উঠল ।




দুগ্মন্ত



যে-দেশে ঋষির তপোবন ছিল, সেই দেশের রাজার নাম ছিল—দুগ্মন্ত ।

সেকালে এত বড় রাজা কেউ ছিল না । তিনি পূব-দেশের রাজা, পশ্চিম-দেশের রাজা, উত্তর-দেশের রাজা, দক্ষিণ-দেশের রাজা—সব রাজার রাজা ছিলেন । সাত-সমুদ্র-তের-নদী সব তাঁর রাজ্য । পৃথিবীর এক রাজা—রাজা দুগ্মন্ত । তাঁর কত সৈন্যসামন্ত ছিল, হাতিশালে কত হাতি ছিল, ঘোড়াশালে কত ঘোড়া ছিল, গাড়িখানায় কত সোনা রুপোর রথ ছিল, রাজমহলে কত দাস-দাসী ছিল ; দেশ জুড়ে তাঁর সুনাম ছিল, ক্রোশ জুড়ে সোনার রাজপুরী ছিল,




আর ব্রাহ্মণকুমার মাধব্য সেই রাজার প্রিয় সখা ছিল ।
যেদিন তপোবনে মল্লিকার ফুল ফুটল সেই দিন সাত-সমুদ্র
তের-নদীর রাজা, দুস্বস্ত, প্রিয়সখা মাধব্যকে বললেন—‘চল
বন্ধু, আজ মুগয়ায় যাই ।’
মুগয়ার নামে মাধব্যের যেন জ্বর এল । গরিব ব্রাহ্মণ
রাজবাড়িতে রাজার হালে থাকে, দুবেলা খাল-খাল
লুচি-মগু, ভার-ভার ক্ষীর দই দিয়ে মোটা পেট ঠাণ্ডা রাখে,
মুগয়ার নামে বেচারার মুখ এতটুকু হয়ে গেল, বায় ভালুকের
ভয়ে প্রাণ কেঁপে উঠল ।
‘না’ বলবার যো কি, রাজার আজ্ঞা !
অমনি হাতিশালে হাতি সাজল, ঘোড়াশালে ঘোড়া সাজল,
কোমর বেঁধে পালোয়ান এল, বর্শা হাতে শিকারী এল, ধনুক
হাতে ব্যাধ এল, জাল ঘাড়ে জেলে এল । তারপর সারথি
রাজার সোনার রথ নিয়ে এল, সিংহদ্বারের সোনার কপাট
বান্‌বানা দিয়ে খুলে গেল ।
রাজা সোনার রথে শিকারে চললেন ।
দুপাশে দুই রাজহস্তী চামরটোলাতে-টোলাতে চলল, ছত্রধর
রাজছত্র ধরে চলল, জয়ঢাক বাজতে-বাজতে চলল, আর
সর্বশেষে প্রিয়সখা মাধব্য এক খোঁড়া ঘোড়ায় হটহট করে
চললেন । ক্রমে রাজা এ-বন সে-বন ঘুরে শেষে মহাবনে এসে
পড়লেন । গাছে-গাছে ব্যাধ ফাঁদ পাততে লাগল, খালে-বিলে
জেলে জাল ফেলতে লাগল, সৈন্যসামন্ত বন ঘিরতে লাগল—
বনে সাড়া পড়ে গেল !
গাছে-গাছে কত পাখি, কত পাখির ছানা পাতার ফাঁকে-ফাঁকে
কচি পাতার মতো ছোট ডানা নাড়ছিল, রাজা ফুলের মতো
ডালে দুলছিল, আকাশে উড়ে যাচ্ছিল, কোটরে ফিরে আসছিল,
কিচমিচ করছিল । ব্যাধের সাড়া পেয়ে, বাসা ফেলে, কোটর
ছেড়ে, কে কোথায় পালাতে লাগল ।

মোষ গরমের দিনে ভিজে কাদায় পড়ে ঠাণ্ডা হচ্ছিল, তাড়া পেয়ে—শিং উঁচিয়ে ঘাড় ঝেঁকিয়ে গহন বনে পালাতে লাগল। হাতি শুঁড়ে করে জল ছিটিয়ে গা ধুচ্ছিল, শালগাছে গা ঘষছিল, গাছের ডাল ঘুরিয়ে মশা তাড়াচ্ছিল, ভয় পেয়ে—শুঁড় তুলে, পদ্মবন দলে, ব্যাধের জাল ছিড়ে পালাতে আরম্ভ করলে। বনে বাঘ হাঁকার দিয়ে উঠল, পর্বতে সিংহ গর্জন করে উঠল, সারা বন কেঁপে উঠল। কত পাখি, কত বরা, কত বাঘ, কত ভালুক, কেউ জালে ধরা পড়ল, কেউ ফাঁদে বাঁধা পড়ল, কেউ বা তলোয়ারে কাটা গেল; বনে হাহাকার পড়ে গেল। বনের বাঘ বন দিয়ে, জলের কুমির জল দিয়ে, আকাশের পাখি আকাশ ছেয়ে পালাতে আরম্ভ করলে। ফাঁদ নিয়ে ব্যাধ পাখির সঙ্গে ছুটল, তীর নিয়ে বীর বাঘের সঙ্গে গেল, জাল ঘাড়ে জেলে মাছের সঙ্গে চলল, রাজা সোনার রথে



এক হরিণের সঙ্গে ছুটলেন। হরিণ প্রাণভয়ে হাওয়ার মতো রথের আগে দৌড়িয়েছে, সোনার রথ তার পিছনে বিদ্যুতের বেগে চলেছে। রাজার সৈন্য-সামন্ত, হাতি-ঘোড়া, প্রিয়সখা মাধব্য, কতদূরে কোথায় পড়ে রইল। কেবল রাজার রথ আর বনের হরিণ নদীর ধার দিয়ে, বনের ভিতর দিয়ে, মাঠের উপর দিয়ে ছুটে চলল। যখন গহন বনে এই শিকার চলছিল তখন সেই তপোবনে সকলে নির্ভয়ে ছিল। গাছের ডালে টিয়াপাখি লাল-ঠোঁটে ধান খুঁটছিল, নদীর জলে মনের সুখে হাঁস ভাসছিল, কুশবনে পোষা-হরিণ নির্ভয়ে খেলা করছিল : আর শকুন্তলা, অনসূয়া, প্রিয়স্বদা—তিন সখী কুঞ্জবনে গুন্-গুন্ গল্প করছিল। এই তপোবনে সকলে নির্ভয়, কেউ কারো হিংসা করে না। মহাযোগী কপ্তের তপোবনে বাঘে-গরুতে এক ঘাটে জল খায়। হরিণ-শিশু ও সিংহশাবক এক বনে খেলা করে। এ-বনে





রাজাদেরও শিকার করা নিষেধ । রাজার শিকার—সেই হরিণ—উর্ধ্বশ্বাসে এই তপোবনের-ভিতর চলে গেল । রাজা অমনি ধনুঃশর ফেলে ঋষিদর্শনে চললেন ।

সেই তপেবনে সোনার রথে পৃথিবীর রাজা, আর মাধবীকুঞ্জে রূপসী শকুন্তলা—দুজনে দেখা হল ।

এদিকে মাধব্য কি বিপদেই পড়েছে ! আর সে পারে না ! রাজভোগ না হলে তার চলে না, নরম বিছানা ছাড়া ঘুম হয় না, পালকি ছাড়া সে এক-পা চলে না, তার কি সারাদিন ঘোড়ার পিঠে চড়ে 'ওই বরা যায়, ওই বাঘ পালায়' করে এ-বন সে-বন ঘুরে বেড়ানো পোষায় ! পল্লবের পাতা-পাচা কষা জলে কি তার তষ্ণা ভাঙে ? ঠিক সময় রাজভোগ না পেলে সে অন্ধকার দেখে, তার কি সারাদিনের পর একটু আধপোড়া মাংসে পেট ভরে ? পাতার বিছানায় মশার কামড়ে তার কি ঘুম হয় ? বনে এসে ব্রাহ্মণ মহা মুশকিলে পড়েছে ! সমস্ত দিন ঘোড়ার পিঠে ফিরে সর্বাঙ্গে দারুণ ব্যথা, মশার জ্বালায় রাত্রে নিদ্রা নেই, মনে সর্বদা ভয়—ওই ভাল্লুক এল, ওই বুঝি বাঘে ধরলে ! ভয়ে-ভয়ে বেচারা আধখানা হয়ে গেছে । রাজাকে কত বোঝাচ্ছে—'মহারাজ, রাজ্য ছারখারে যায়, শরীর মাটি হল, আর কেন ? রাজ্যে চলুন ।' রাজা তবু শুনলেন না, শকুন্তলাকে দেখে অবধি রাজকার্য ছেড়ে, মৃগয়া ছেড়ে তপস্বীর মতো সেই তপোবনে রইলেন । রাজ্যের রাজার মা ব্রত করছেন, রাজাকে ডেকে পাঠালেন, তবু রাজ্যে ফিরলেন না, কত ওজর-আপত্তি করে মাধব্যকে সব সৈন্যসামন্ত সঙ্গে মা-র কাছে পাঠিয়ে দিয়ে একলা সেই তপেবনে রইলেন ।

মাধব্য রাজবাড়িতে মনের আনন্দে রাজার হালে আছে, আর এদিকে পৃথিবীর রাজা বনবাসীর মতো বনে-বনে 'হা শকুন্তলা ! হো শকুন্তলা !' বলে ফিরছে । হাতের ধনুক, তুণের বাণ কোন বনে পড়ে আছে ! রাজবেশ নদীর জলে ভেসে গেছে, সোনার তঙ্গ কালি হয়েছে, দেশের রাজা বনে ফিরছে ।

আর শকুন্তলা কি করছে ?—

নিকুঞ্জবনে পদ্মের বিছানায় বসে পদ্ম-পাতায় মহারাজাকে মনের কথা লিখছে । রাজাকে দেখে কে জানে তার মন কেমন হল ! একদণ্ড না দেখলে প্রাণ কাঁদে, চোখের জলে বুক ভেসে যায় । দুই সখী-তাকে পদ্মফুলে বাতাস করছে, গলা ধরে কত আদর করছে, আঁচলে চোখ মোছাচ্ছে আর ভাবছে—এইবার ভোর হল, বুঝি সখীর রাজা ফিরে এল ।

তারপর কি হল ?

দুঃখের নিশি প্রভাত হল, মাধবীর পাতায়-পাতায় ফুল ফুটল, নিকুঞ্জের গাছে-গাছে পাখি ডাকল, সখীদের পোষা হরিণ কাছে এল ।

আর কি হল ?

বনপথে রাজা-বর কুঞ্জে এল ।

আর কি হল ?


পৃথিবীর রাজা আর বনের শকুন্তলা—দুজনে মালা-বদল হল ।

দুই সখীর মনোবাঞ্ছা পূর্ণ হল ।

তারপর কি হল ?

তারপর কতদিন পরে সোনার সাঁঝে সোনার রথ রাজাকে নিয়ে রাজ্যে গেল, আর আঁধার বনপথে দুই প্রিয়সখী শকুন্তলাকে নিয়ে ঘরে গেল ।

তপোবনে




রাজা রাজ্যে চলে গেলেন, আর শকুন্তলা সেই বনে দিন গুনতে লাগল ।

যাবার সময় রাজা নিজে মোহর-আংটি শকুন্তলাকে দিয়ে গেলেন, বলে গেলেন—'সুন্দরী, তুমি প্রতিদিন আমার নামের একটি করে অক্ষর পড়বে, নামও শেষ হবে আর বনপথে সোনার রথ তোমাকে নিতে আসবে ।'

কিন্তু হয়, সোনার রথ কই এল ?

কতদিন গেল, কত রাত গেল, দুঃস্বপ্ন নাম কতবার পড়া হয়ে গেল তবু সোনার রথ কই এল ? হয় হয়, সোনার সাঁঝে সোনার রথ সেই যে গেল আর ফিরল না ! পৃথিবীর রাজা




সোনার সিংহাসনে, আর বনের রানী কুটির-দুয়ারে—দুজনে
দুইখানে ।

রাজার শোকে শকুন্তলার মন ভেঙে পড়ল । কোথায় রইল
অতিথি-সেবা, কোথা রইল পোষা-হরিণ, কোথা রইল সাধের
নিকুঞ্জবনে প্রাণের দুই প্রিয়সখী ! শকুন্তলার মুখে হাসি নেই,
চোখে ঘুম নেই ! রাজার ভাবনা নিয়ে কুটির-দুয়ারে-
পাষণ-প্রতিমা বসে রইল ।
রাজার রথ কেন এল না ?
কেন রাজা ভুলে রইলেন ?

রাজা রাজ্যে গেলে একদিন শকুন্তলা কুটির-দুয়ারে গালে হাত
দিয়ে বসে-বসে রাজার কথা ভাবছে—ভাবছে আর কাঁদছে,
এমন সময় মহর্ষি দুর্বাসা দুয়ারে অতিথি এলেন, শকুন্তলা
জানতেও পারলে না, ফিরেও দেখলে না । একে দুর্বাসা মহা
অভিমানী, একটুতেই মহা রাগ হয়, কথায়-কথায় যাকে-তাকে
ভস্ম করে ফেলেন, তার উপর শকুন্তলার এই অনাদর—তাকে
প্রণাম করলে না, বসতে আসন দিলে না, পা ধোবার জল দিলে
না !

দুর্বাসার সর্বাস্পে যেন আগুন ছুটল, রাগে কাঁপতে কাঁপতে
বললেন—কী ! অতিথির অপমান ? পাপীয়সী, এই
অভিসম্পাত করছি—যার জন্য আমার অপমান করলি সে
যেন তোকে কিছুতেই না চিনতে পারে ।
হায়, শকুন্তলার কি তখন জ্ঞান ছিল—যে দেখবে, কে এল, কে
গেল ! দুর্বাসার একটি কথাও তার কানে গেল না ।
মহামানী মহর্ষি দুর্বাসা ঘোর অভিসম্পাত করে চলে
গেলেন—সে কিছুই জানতে পারলে না, কুটির-দুয়ারে
আনমনে যেমন ছিল তেমনি রইল ।



অনসূয়া প্রিয়ম্বদা দুই সখী উপবনে ফুল তুলছিল, ছুটে এসে দুর্বাসার পায়ে লুটিয়ে পড়ল। কত সাধ্য-সাধনা করে, কত কাকূতি-মিনতি করে, কত হাতে-পায়ে ধরে দুর্বাসাকে শান্ত করলে !

শেষে এই শাপান্ত হল—‘রাজা যাবার সময় শকুন্তলাকে যে-আংটি দিয়ে গেছেন সেই আংটি যদি রাজাকে দেখাতে পারে তবেই রাজা শকুন্তলাকে চিনবে ; যতদিন সেই আংটি রাজার হাতে না পড়বে ততদিন রাজা সব ভুলে থাকবেন। দুর্বাসার অভিশাপে তাই পৃথিবীর রাজা সব ভুলে রইলেন। বনপথে সোনার রথ আর ফিরে এল না।

এদিকে দুর্বাসাও চলে গেলেন আর তাত-কণ্ঠও তপোবনে ফিরে এলেন। সারা পৃথিবী খুঁজে শকুন্তলার বর মেলেনি। তিনি ফিরে এসে শুনলেন সারা পৃথিবীর রাজা বনে এসে তার গলায়

মালা দিয়েছেন। তাত-কণ্ঠের আনন্দের আর সীমা রইল না, তখনি শকুন্তলাকে রাজার কাছে পাঠাবার উদ্যোগ করতে লাগলেন। দুঃখে অভিমানে শকুন্তলা মাটিতে মিশে ছিল, তাকে কত আদর করলেন, কত আশীর্বাদ করলেন। উপবনে দুই সখী যখন শুনলে শকুন্তলা স্বশুরবাড়ি চলল, তখন তাদের আহ্বানের সীমা রইল না।

প্রিয়ম্বদা কেশর ফুলের হার নিলে, অনসূয়া গন্ধ ফুলের তেল নিলে ; দুই সখীতে শকুন্তলাকে সাজাতে বসল। তার মাথায় তেল দিলে, খেঁপায় ফুল দিলে, কপালে সিঁদুর দিলে, পায়ে আলতা দিলে, নতুন বাকল দিলে ; তবু তো মন উঠল না ! সখীরএ কিবেশ করে দিলে ? প্রিয়সখী শকুন্তলা পৃথিবীর রানী, তার কি এই সাজ ?—হাতে মৃণালের বালা, গলায় কেশরের মালা, খেঁপায় মল্লিকার ফুল, পরনে বাকল !—হায়, হায়, মতির মাল কোথায় ? হীরের বালা কোথায় ? সোনার মল



কোথায় ? পরনে শাড়ি কোথায় ?

বনের দেবতারা সখীদের মনোবাঞ্ছা পূর্ণ করলেন ।

বনের গাছ থেকে সোনার শাড়ি উড়ে পড়ল, পায়ের মল বেজে পড়ল । বনদেবতারা পলকে বনবাসিনী শকুন্তলাকে রাজ্যেশ্বরী মহারানীর সাজে সাজিয়ে দিলেন ।

তারপর যাবার সময় হল । হায়, যেতে কি পা সরে, মন কি চায় ?

শকুন্তলা কোনদিকে যাবে—সোনার পুরীতে রানীর মতো রাজার কাছে চলে যাবে ?—না, তিন সখীতে বনপথে আজন্মকালের তপোবনে ফিরে যাবে ?

এদিকে শুভলগ্ন বয়ে যায়, ওদিকে বিদায় আর শেষ হয় না ।
কুঞ্জবনে মল্লিকা মাধবী কচি-কচি পাতা নেড়ে ফিরে ডাকছে,
মা-হারা হরিণ-শিশু সোনার আঁচল ধরে বনের দিকে টানছে,
প্রাণের দুই প্রিয়সখী গলা ধরে কাঁদছে । একদণ্ডে এত মায়া
এত ভালোবাসা কাটানো কি সহজ ?

মা-হারা হরিণ-শিশুকে তাত-কণ্ঠের হাতে, প্রিয় তরুলতাদের
প্রিয়সখীদের হাতে সঁপে দিতে কত বেলাই হয়ে গেল ।
তপোবনের শেষে বটগাছ, সেখান থেকে তাত-কণ্ঠ ফিরলেন !
দুই সখী কেঁদে ফিরে এল । আসবার সময় শকুন্তলার আঁচলে
রাজার সেই আংটি বেঁধে দিলে, বলে দিলে—‘দেখিস ভাই,
যত্ন করে রাখিস ।’

তারপর বনের দেবতাদের প্রণাম করে, তাত-কণ্ঠকে প্রণাম
করে শকুন্তলা রাজপুরীর দিকে চলে গেল ।

পরের মেয়ে পর হয়ে পরের দেশে চলে গেল—বনখানা
আঁধার করে গেল !

ঋষির অভিশাপ কখনো মিথ্যে হয় না । রাজপুরে যাবার পথে
শকুন্তলা একদিন শচীতীর্থের জলে গা ধুতে গেল । সাঁতার

জলে গা ভাসিয়ে, নদীর জলে ঢেউ নাচিয়ে শকুন্তলা গা ধুলে ।
 বঙ্গভরে অঙ্গের শাড়ি জলের উপর বিছিয়ে দিলে ; জলের
 মতো চিকণ আঁচল জলের সঙ্গে মিশে গেল, ঢেউয়ের সঙ্গে
 গড়িয়ে গেল । সেই সময়ে দুর্বাসার শাপে রাজার সেই আংটি
 শকুন্তলার চিকণ আঁচলের এক-কোণ থেকে অগাধ জলে পড়ে
 গেল, শকুন্তলা জানতেও পারল না ।
 তারপর ভিজে কাপড়ে তীরে উঠে, কালো চুল এলো করে,
 হাসিমুখে শকুন্তলা বনের ভিতর দিয়ে রাজার কথা
 ভাবতে-ভাবতে শূন্য আঁচল নিয়ে রাজপুরে চলে গেল,
 আংটির কথা মনেই পড়ল না ।



২৬

রাজপুরে



দুর্বাসার শাপে রাজা শকুন্তলাকে একেবারে ভুলে বেশ সুখে
 আছেন । সাত-কোশ জুড়ে রাজার সাতমহল বাড়ি, তার
 এক-এক মহলে এক-এক রকম কাজ চলছে !
 প্রথম মহলে রাজসভা—সেখানে সোনার থামে সোনার ছাদ,
 তার তলায় সোনার সিংহাসন ; সেখানে দোষী-নির্দোষের
 বিচার চলছে ।
 তারপর, দেবমন্দির—সেখানে সোনার দেয়ালে মানিকের পাখি,
 মুক্তের ফল, পান্নার পাতা ! মাঝখানে প্রকাণ্ড হোমকুণ্ড,
 সেখানে দিব্যরাত্রি হোম হচ্ছে । তারপর অথিতিশালা—
 সেখানে সোনার থালায় দু-সন্ধ্যা লক্ষ লক্ষ অতিথি খাচ্ছে ।

২৭



তারপর, নৃত্যশালা—সেখানে নাচ চলছে, শানের উপর সোনার নূপুর রনুবুনু বাজছে, স্ফটিকের দেয়ালে অপ্সের ছায়া তালে-তালে নাচছে।

সঙ্গীতশালায় গান চলছে, সোনার পালঙ্কে পৃথিবীর রাজা রাজা-দুঃস্বপ্ন বসে আছেন, দক্ষিণ-দুয়ারি ঘরে দক্ষিণের বাতাস আসছে ; শকুন্তলার কথা তাঁর মনেই নেই। হয় দুর্বাসার শাপে, সুখের অন্তঃপুরে সোনার পালঙ্কে রাজা সব ভুলে রইলেন।

আর শকুন্তলা কত ঝড়-বৃষ্টিতে, কত পথ চলে, রাজার কাছে এল, রাজা চিনতেও পারলেন না ; বললেন—‘কন্যে, তুমি কেন এসেছ ? কি চাও ? টাকা-কড়ি চাও, না, ঘর-বাড়ি চাও ? কি চাও ?’

শকুন্তলা বললে—‘মহারাজ, আমি টাকা চাই না, কড়িও চাই না, ঘর-বাড়ি কিছুই চাই না, আমি চাই তোমায়। তুমি আমার রাজা, আমার গলায় মলা দিয়েছ, আমি তোমায় চাই।’
রাজা বললেন—‘ছি ছি, কন্যে, এ কি কথা ? তুমি হলে বনবাসিনী তপস্বিনী, আমি হলেম রাজ্যেশ্বর মহারাজা, আমি তোমায় কেন মালা দেব ? টাকা চাও টাকা নাও, ঘর-বাড়ি চাও তাই নাও, গায়ের গহনা চাও তাও নাও। রাজ্যেশ্বরী হতে চাও—এ কেমন কথা ?’

রাজার কথায় শকুন্তলার প্রাণ কেঁপে উঠল, কাঁদতে কাঁদতে বললে—‘মহারাজ, সে কি কথা ? আমি যে সেই

শকুন্তলা—আমায় ভুলে গেলে ? মনে নেই, মহারাজ, সেই মাধবীর বনে একদিন আমরা তিন সখীতে গুনগুন গল্প করছিলাম, এমন সময় তুমি অতিথি এলে ; সখীরা তোমায় পা-ধোবার জল দিলে, আমি আঁচলে ফল এনে দিলেম, তুমি হাসিমুখে তাই খেলে। তারপর একটা পদ্মপাতায় জল নিয়ে



আমার হরিণশিশুকে খাওয়াতে গেলে, সে ছুটে পালাল, তুমি কত ডাকলে, কত মিষ্টি কথা বললে, কিছুতেই এল না। তারপর আমি ডাকতেই আমার কাছে এল, আমার হাতে জল খেল, তুমি আদর করে বললে—দুইজনেই বনের প্রাণী কিনা তাই এত ভাব!—শুনে সখীরা হেসে উঠল, আমি লজ্জায় মরে গেলাম। তারপর, মহারাজ, তুমি কতদিন তপস্বীর মতো সে-বনে রইলে। বনের ফল খেয়ে, নদীর জল খেয়ে কতদিন কাটালে। তারপর একদিন পূর্ণিমা রাতে মালিনীর তীরে নিকুঞ্জবনে আমার কাছে এলে, আমার গলায় মালা দিলে—মহারাজ, সে-কথা কি ভুলে গেলে? ‘ঘাবার সময় তুমি মহারাজ, আমার হাতে তোমার আংটি পরিয়ে দিলে; প্রতিদিন তোমার নামের একটি করে অক্ষর পড়তে বলে দিলে, বলে গেলে—নামও শেষ হবে আর আমায় নিতে সোনার রথ পাঠাবে। কিন্তু মহারাজ, সোনার রথ কই




পাঠালে, সব ভুলে রইলে? মহারাজ, এমনি করে কি কথা রাখলে?’ বনবাসিনী শকুন্তলা রাজার কাছে কত অভিমান করলে, রাজাকে কত অনুযোগ করলে, সেই কুঞ্জবনের কথা, সেই দুই সখীর কথা, সেই হরিণ-শিশুর কথা—কত কথাই মনে করিয়ে দিলে, তবু রাজার মনে পড়ল না। শেষে রাজা বললেন—‘কই, কন্যা, দেখি তোমার সেই আংটি? তুমি যে বললে আমি তোমায় আংটি দিয়েছি, কই দেখাও দেখি কেমন আংটি?’ শকুন্তলা তাড়াতাড়ি আঁচল খুলে আংটি দেখাতে গেল, কিন্তু হায়, আঁচল শূন্য! রাজার সেই সাত রাজার ধন এক-মানিকের বরণ-আংটি কোথায় গেল! এতদিনে দুর্বসার শাপ ফলল। হায়, রাজাও তার পর হলেন,



পৃথিবীতে আপনার লোক কেউ রইল না !
 'মা-গো !'—বলে শকুন্তলা রাজসভায় শানের উপর ঘুরে
 পড়ল ; তার কপাল ফুটে রক্ত ছুটল, রাজসভায় হাঁহকার পড়ে
 গেল ।

সেই সময় শকুন্তলার সেই পাষাণী-মা মেনকা স্বর্গপুরে ইন্দ্রসভায়
 বীণা বাজিয়ে গান গাইছিল । হঠাৎ তার বীণার তার ছিড়ে
 গেল, গানের সুর হারিয়ে গেল, শকুন্তলার জন্য প্রাণ কেঁদে
 উঠল । অমনি সে বিদ্যুতের মতো মেঘের রথে এসে রাজার
 সভা থেকে শকুন্তলাকে কোলে তুলে একেবারে হেমকূট পর্বতে
 নিয়ে গেল ।

সেই হেমকূট পর্বতে কশ্যপের আশ্রমের স্বর্গের অঙ্গরাদের
 মাঝে কতদিনে শকুন্তলার একটি রাজচক্রবর্তী রাজকুমার হল ।
 সেই কোল-ভরা ছেলে পেয়ে শকুন্তলার বুক জুড়ল ।
 শকুন্তলা তো চলে গেল । এদিকে রাজবাড়ির জেলেরা একদিন
 শচীতীরের জলে জাল ফেলতে আরম্ভ করলে । রূপোলি
 রঙের সরলপুঁটি, চাঁদের মতো পায়রাচাঁদা, সাপের মতো
 বানমাছ, দাড়াওয়ালা চিংড়ি, কাঁটাভরা বাটা কত কি জালে
 পড়ল । সোনালি রূপোলি মাছে নদীর পাড়, মাছের ঝুড়ি যেন
 সোনায় রূপোয় ভরে গেল । সারাদিন জেলেরদের জালে কত
 রকমের কত যে মাছ পড়ল, তার আর ঠিকানা নেই । শেষে
 ক্রমে বেলা পড়ে এল; নীল আকাশ নদীর জল, নগরের পথ
 আঁধার হয়ে এল, জাল গুটিয়ে জেলেরা ঘরে চলল ।
 এমন সময় এক জেলে জাল ঘাড়ে নদীতীরে দেখা দিল ।
 প্রকাণ্ড জালখানা মাথার উপর ঘুরিয়ে নদীর উপর উড়িয়ে
 দিলে ; মেঘের মতো কালো জাল আকাশে ঘুরে, নদীর এ-পার
 ও-পার দু-পার জুড়ে জলে পড়ল । সেই সময় মাছের সদরি,
 নদীর রাজা, বুড়ো মাছ রই অন্ধকারে সন্ধ্যার সময় সেই



নদী-ঘেরা কালো জালে ধরা পড়ল। জেলে পাড়ায় রব উঠল—জাল কাটবার গুরু, মাছের সর্দার, বুড়ো রুই এতদিনে জালে পড়েছে। যে যেখানে ছিল নদীতীরে ছুটে এল। তারপর অনেক কষ্টে মাছ ডাঙায় উঠল। এত বড় মাছ কেউ কখনো দেখেনি। আবার যখন সেই মাছের পেট চিরতে সাতরাজার ধন এক মানিকের আংটি জ্বলন্ত আগুনের মতো ঠিকরে পড়ল তখন সবাই অবাক হয়ে রইল। যার মাছ তার আনন্দের সীমা রইল না।

গরীব জেলে যেন আকাশের চাঁদ হাতে পেলে। মাছের বুড়ি, ছেঁড়া-জাল জলে ফেলে মানিকের আংটি সেকরার দোকানে বেচতে চলল। রাজা শকুন্তলাকে যে আংটি দিয়েছিলেন—এ সেই আংটি। শচীতীর্থে গা ধোবার সময় তার আঁচল থেকে যখন জলে পড়ে যায় তখন রুইমাছটা খাবার ভেবে গিলে ফেলেছিল।

জেলের হাতে রাজার মোহর আংটি দেখে সেকরা কোটালকে খবর দিল। কোটাল জেলে মারতে-মারতে রাজসভায় হাজির করলে। বেচারি জেলে রাজদরবারে দাঁড়িয়ে কাঁপতে-কাঁপতে, কেমন করে মাছের পেটে আংটি পেয়েছে নিবেদন করলে।

রাজমন্ত্রী দেখলেন সত্যিই আংটিতে মাছের গন্ধ। জেলে ছাড়া পেয়ে মোহরের তোড়া বখশিশ নিয়ে নাচতে-নাচতে বাড়ি গেল।


এদিকে আংটি হাতে পড়তেই রাজার তপোবনের কথা সব মনে পড়ে গেল।

শকুন্তলার শোকে রাজা যেন পাগল হয়ে উঠলেন। বিনা দোষে তাকে দূর করে দিয়ে প্রাণ যেন তুষের আগুনে পুড়তে লাগল। মুখে অন্য কথা নেই, কেবল—‘হা শকুন্তলা!—হা শকুন্তলা!’ আহারে, বিহারে, শয়নে, স্বপনে, কিছুতেই সুখ নেই;



রাজকার্যে সুখ নেই, অন্তঃপুরে সুখ নেই, উপবনে সুখ
নেই—কোথাও সুখ নেই।
সঙ্গীতশালায় গান বন্ধ হল, নৃত্যশালায় নাচ বন্ধ হল, উপবনে
উৎসব বন্ধ হল।
রাজার দুঃখের সীমা রইল না।
একদিকে বনবাসিনী শকুন্তলা কোল-ভরা ছেলে নিয়ে
হেমকূটের সোনার শিখরে বসে রইল, আর একদিকে জগতের
রাজা, রাজা-দুঃখ জগৎজোড়া শোক নিয়ে ধূলায় ধূসর পড়ে
রইলেন।

কতদিন পরে দেবতার কৃপা হল।
স্বর্গ থেকে ইন্দ্রদেবের রথ এসে রাজাকে দৈত্যদের সঙ্গে যুদ্ধ
করবার জন্যে স্বর্গপুরে নিয়ে গেল। সেখানে মন্দনবনে কত দিন
কাটিয়ে, দৈত্যদের সঙ্গে কত যুদ্ধ করে, মন্দারের মালা গলায়
পরে, রাজা রাজ্যে ফিরলেন—এমন সময় দেখলেন, পথে
হেমকূট পর্বত, মহর্ষি কশ্যপের আশ্রম। রাজা মহর্ষিকে প্রণাম
করবার জন্যে সেই আশ্রমে চললেন।
এই আশ্রমে অনেক তাপস, অনেক তপস্বিনী থাকতেন, অনেক
অঙ্গর, অনেক অঙ্গরা থাকত। আর থাকত—শকুন্তলা আর
তার পুত্র রাজপুত্র সর্বদমন।
রাজা দুঃখ যেন দেশের রাজা ছিলেন, তাঁর সেই রাজপুত্র
তেমনি বনের রাজা ছিল। বনের যত জীবজন্তু তাকে বড়ই
ভালোবাসত।
সেই বনে সাত-ক্রোশ জুড়ে একটা প্রকাণ্ড বটগাছ ছিল, তার
তলায় একটা প্রকাণ্ড অজগর দিনরাত্রি পড়ে থাকত। এই
গাছতলায় সর্বদমনের রাজসভা বসত।
হাতিরা তাকে মাথায় করে নদীতে নিয়ে যেত, শুঁড়ে করে
জল ছিটিয়ে গা ধুইয়ে দিত, তারপর তাকে সেই সাপের পিঠে



বসিয়ে দিত—এই তার রাজসিংহাসন। দুদিকে দুই হাতি
পদ্মফুলের চামর দোলাত, অজগর ফণা মেলে মাথায় ছাতা
ধরত। ভালুক ছিল মন্ত্রী, সিংহ ছিল সেনাপতি, বাঘ চৌকিদার,
শেয়াল ছিল কোটাল; আর ছিল—শুক-পাখি তার প্রিয়সখা,
কত মজার-মজার কথা বলত, দেশ-বিদেশের গল্প করত। সে
পাখির বাসায় পাখির ছানা নিয়ে খেলা করত, বাঘের বাসায়
বাঘের কাছে বসে থাকত—কেউ তাকে কিছু বলত না। সবাই
তাকে ভয়ও করত, ভালোও বাসত। রাজা যখন সেই বনে
এলেন তখন রাজপুত্র একটা সিংহশিশুকে নিয়ে খেলা করছিল,
তার মুখে হাত পুরে দাঁত গুনছিল, তাকে কোলে-পিঠে করছিল,
৩৮

তার জটা ধরে টানছিল। বনের তপস্বিনীরা কত ছেড়ে দিতে
বলছিলেন, কত মাটির ময়ূরের লোভ দেখাছিলেন, শিশু
কিছুতেই গুনছিল না।

এমন সময় রাজা সেখানে এলেন, সিংহ-শিশুকে ছাড়িয়ে সেই
রাজ-শিশুকে কোলে নিলেন; দুটু শিশু রাজার কোলে শান্ত
হল।

সেই রাজ-শিশুকে কোলে করে রাজার বুক যেন জুড়িয়ে
গেল। রাজা তো জানেন না যে এ-শিশু তাঁরই পুত্র।

ভাবছেন—পরের ছেলেকে কোলে করে মম কেন এমন হল,
এর উপরে কেন এত মায়া হল?

এমন সময় শকুন্তলা অঞ্চলের নিধি কোলের বাছাকে
খুঁজতে-খুঁজতে সেখানে এলেন।

রাজারানীতে দেখা হল, রাজা আবার শকুন্তলাকে আদর
করলেন, তার কাছে ক্ষমা চাইলেন। দেবতার কৃপায় এতদিনে
আবার মিলন হল, দুর্বাসার শাপান্ত হল। কশ্যপ-অদিতিকে
প্রণাম করে রাজারানী রাজপুত্র কোলে রাজ্যে ফিরলেন।

তারপর কতদিন সুখে রাজত্ব করে রাজপুত্রকে রাজ্য দিয়ে,
রাজারানী সেই তপোবনে তাত-কণ্ঠের কাছে, সেই দুই সখীর
কাছে, সেই হরিণ-শিশুর কাছে, সেই সহকার এবং মাধবীলতার
কাছে ফিরে গেলেন এবং তাপস-তাপসীদের সঙ্গে সুখে জীবন
কাটিয়ে দিলেন।

